

57X
26
47

書
治
書
字
五

羣書治要卷第三十五

秘書監鉅鹿男臣魏徵等奉勅撰

文子 曾子

文子 老子弟子

道原

夫至人之治也弃其聰明滅其文章依道廢
智與民同出公約其所守寡其所求去其
誘慕除其嗜欲損其思慮約其所守即察矣

鳥原秘藏



羣書治要卷第三十五

寡其 sought 即得矣

水之性欲清沙石穢之人之性欲平嗜欲害之唯聖人能遺物反己不以智役物不以欲滑和是以高而不危安而不傾也故聽善言便計雖愚者知悅之稱聖德高行雖不肖者知慕之悅之者衆而用之者寡慕之者多而行之者少

精誠

夫水濁者魚噞政苛即民亂上多欲則下多詐上煩擾即下不定上多求即下交爭不治其本而救之於末無以異於鑿渠而止水抱薪而救火也聖人事省而治求寡而贍不施而仁不言而信不求而得不爲而成懷自然保至真抱道推誠天下從之如響之應聲影之象形所脩者本也
冬日之陽夏日之陰萬物歸之而莫之使也

至精之感弗召自來不去往不知所爲者而
功自成待目而照見待言而使令其於以治
難矣皋陶喑而爲大理天下無虐刑師曠瞽
而爲大宰晉國無亂政不言之令不視之見
聖人所以爲師民之化上不從其言從其所
行也故人君好勇而國家多難人君好色而
國多昏亂故聖人精誠形於內好憎明於外
出言以副情發號以明旨是故刑罰不足以

移風殺戮不足以禁姦唯神化爲貴也夫至
精爲神精之所動若春氣之生秋氣之殺也
故治人者慎所以感也

聖人之從事也所由異路而同歸其存亡定
傾若一志不忘乎欲利人也故秦楚燕魏之
歌異轉而皆樂九夷八狄之哭異聲而皆哀
夫歌者樂之徵也哭者哀之效也惛惛於中
而應於外故在所以感之矣聖人之心日夜

不忘乎欲利人其澤之所及亦遠也

夫至人精誠內形德流四方見天下有利喜而不忘見天下有害憂若有喪夫憂民之憂者民亦憂其憂樂人之樂者人亦樂其樂故樂以天下憂以天下然而不王者未之有也大人行可悅之政人而莫不順其令令順即從小而致大令逆節以善爲害以成爲敗

九守

神者智之淵也神清則智明智者心之符也智公即心平人莫鑒於流水而鑒於澄水者以其清且靜也故神清意平乃能形物之情也天道極即反盈則損物盛則衰日中而移月滿則虧樂終而悲是故聰明廣智守以愚多聞博辨守以儉武力勇毅守以畏富貴廣大守以狹德施天下守以讓此五者先王所以守天下也

符言

人之情服於德不服於力故古之聖王以其言下人以其身後人即天下推而不厭戴而不重此德有餘而氣順也故知與之爲得知後之爲先即幾道矣

道德

文子問道老子曰夫道者小行之小得福大行之大得福盡行之天下服

文子問德仁義禮老子曰德者民之所貴也仁者人之所懷也義者民之所畏也禮者民之所敬也此四者聖人之所以御萬物也君子無德即下怨無仁即下爭無義即下異無禮即下亂四經不立謂之無道無道而不亡者未之有也心之精者可以神化而不可以說道故同言而信信在言前同令而行行在令外聖人在上民化如神情以先之也動於

上不應於下者情令殊也三月嬰兒未知殺
害而慈母之憂喻焉者情也故言之用者小
不言之用者大矣夫信君子之言也忠君子
之意也忠信形於內感動應乎外賢聖之化
也

能成霸王者必得勝者也能勝敵者必強者
也能強者必用人力者也能用人力者必得
人心者也能得人心者必自得者也能自得

者必柔弱者也

上德

日月欲明浮雲蓋之河水欲清沙土穢之藪
蘭欲脩秋風敗之人性欲平嗜欲害之蒙塵
而欲無昧不可得也山致其高而雲雨起焉
水致其深而蛟龍生焉君子致其道而德澤
流焉夫有陰德者必有陽報有隱行者必有

照名

微明

相坐之法立即百姓怨滅爵之令張即功臣
叛故察於刀筆之迹者即不知治亂之本習
於行陣之事者即不知廟戰之擁聖人先見
福於重閉之內慮患於冥冥之外愚者惑於
小利而忘大害而事有利於小而害於大得
於此而亡於彼故仁莫大於愛人也智莫大
於知人也愛人即無寃刑知人即無亂政見

本而知末執一而應萬謂之術居知所爲行
知所之事知所乘動知所止謂之道言出於
口不可止於人行發於近不可禁於遠事者
難成易敗名者難立易廢凡人皆以輕小害
易微事以至以至於大患也

夫積愛成福積憎成禍人皆知救患莫知使
患無生夫使患無生易施於救患今人不務
使患無生而務於救之雖神聖人不能爲謀

也患禍之所由來萬萬無方故聖人深居以
避害靜默以待時小人不知禍福之門動作
而陷於刑雖曲爲之備不足以全身故上士
先避患而後就利先遠辱而後求名故聖人
常從事於無形之外而不留心盡慮於已成
之內是以患禍無由至非譽不能塵垢也
凡人之道心欲小志欲大智欲圓行欲方能
欲多事欲少所謂心小者慮患未生戒禍慎

微不敢縱其欲者也志大者兼包萬國一齊
殊俗是非輻湊中爲之轂也智圓者終始無
端方流四遠深泉而不竭也行方者直立而
不撓素白而不污窮不易操達不肆志也能
多者文武備具動靜中儀也事少者執約以
治廣處靜以持躁也故心小者禁於微也志
大者無不懷也智圓無不知也行方者有不
爲也能多者無不治也事少者約所持也故

聖人之於善也無小而不行其於過也無微而不改行不用巫祝而鬼神不敢先可謂至貴矣然而戰戰慄慄日慎一日是以無爲而不成有功離仁義者即見疑有罪不失仁心者必見信故仁義者事之順常也天下之尊爵也雖謀得計當慮患而患解圖國而國存其事有離仁義者其功必不遂矣言雖無中於策其計無益於國而心周於君合於仁義

者身心存矣故曰百言百當不若舍趣而審仁義也教本乎君子小人被其澤利本乎小人君子享其功使君子小人各得其宜即通功易食而道達矣人多欲即傷義多憂即害智故治國樂其所以存亡國樂其所以亡水下流而廣大君下臣而聰明君不與臣爭功而治道通故君根本也臣枝葉也枝本不美而枝葉茂者未之有也慈父之愛子也非求

報也不可內解於心聖人之養民非求爲己
用也性不能已也及恃其力賴其功勲而必
窮矣有以爲即恩不接矣故用衆人之所愛
即得衆人之力舉衆人之所善即得衆人之
心見所始即知所終矣故人之將疾也必先
不甘魚肉之味國之將亡也必先惡忠臣之
語故疾之將死者不可爲良醫國之將亡者
不可爲忠謀古者親近不以言來遠不以言

使近者悅遠者來與民同欲即和與民同守
即固與民同念即智得民力者富得民譽者
顯行有召寇言有致禍

道自然

昔者堯之治天下其導民也水處者漁山處
者木谷處者牧陸處者田地宜其事且其撤
撤便其人如是外民得以所有易所無以所
巧易所拙也是以離叛者寡聽從者衆若風

之過箭忽然感之各以清濁應矣物莫不就其所利避其所害是以隣國相望雞狗之音相聞而足跡不接於諸侯之境車軌不結於千里之外皆安其居也夫亂國若盛治國若虛亡國若不足存國若有餘虛者非無人各守其職也盛者非多人皆徼於未也有餘者非多財欲節事寡也不足者非無貨民躁而費多也故先王之法非所作也所因也其禁

謀非所爲也所守也上德之道也

以道治天下非易民性也因其有而條暢之故瀆水者因水之流產稼者因地之宜征伐者因民之欲能因即無敵於天下矣故先王之制法因民之性而爲之節文無其性無其養不可使遵道也人之性有仁義之資非聖王爲之法度不可使向方也因其所惡以禁姦故刑罰不用威行如神矣因其性即天下

聽從弗其性即法度張而不用帝者貴其德也王者尚其義也霸者迫於理也道狹然後任智德薄然後任刑明淺然後任察

王道者處無爲之事行不言之教因循任下責成不勞謀無失策舉無過事進退應時動靜循理美醜弗好憎賞罰不喜怒其聽治也虛心弱志是故羣臣輻湊並進無愚智不肖莫不盡其能君得所以制臣臣得所以事君

即治國之道明矣

智而好問者聖勇而好同者勝乘衆人之知即無不任也用衆人之力即無不勝也用衆人之力烏獲不足恃也乘衆人之勢天下不足用也故聖人舉事未嘗不因其資而用之也有一形者處一位有一能者服一事力勝其任即舉者不重也能勝其事即爲者弗難也聖人兼而用之故人無弃人物無弃材矣

所謂無爲者非謂其引之不來推之不往迫而不應感而不動堅滯而不流捲握而不散也謂其私志不入公道嗜欲不枉正術循理而舉事因資而立功推自然之勢也聖人不耻身之賤惡道之不行不憂命之短憂百姓之窮也故常虛而無爲抱素見樸不與物雜古之立帝王者非以奉養其欲也聖人之踐位者非以逸樂其身也爲天下之民強掩弱

衆暴寡詐者欺愚勇者侵怯又爲其懷智詐不以相教積財貨不以相分故立天子以齊一之爲一人明不能徧照海內故立三公九卿以輔翼之爲絕國殊俗不得被澤故立諸侯以教誨之是以地無不任時無不應官無隱事國無遺利所以衣寒食飢養老弱息勞倦無不以也神農形悴堯瘦癯舜梨黑禹胼胝伊尹負鼎而干湯呂望鼓刀而入周百里

奚傳賣管仲束縛孔子無黔突墨子無煖席
非以貪祿慕位將欲起天下之利除萬民之
害也自天子至于庶人四體不勤思慮不用
於事贍者未之聞也

下德

治身太上養神其次養形神清意平百節皆
寧養生之本也肥肌膚充腹腸開嗜欲養生
之末也治國太上養化其次正法民交讓爭

處卑財利爭受少事力爭就勞日化上而遷
善不知其所以然治之本也利賞而勸善畏
刑而不敢為非法令正於上百姓服於下治
之末也上世養本而下世事末欲治之主不
世出可與治之臣不萬一以不世出求不萬
一此至治所以千歲不一至霸王之功不世
立也順其善意防其邪心與民同出一道即
民性可善風俗可美矣所貴聖人者非貴其

隨罪而作刑也貴其知亂之所生也若縱之
放僻淫逸而禁之以法隨之以刑雖殘天下
不能禁其姦矣目悅五色口欲滋味耳淫五
聲七竅交爭以害一性日引邪欲竭其天和
身且不能治奈天下何所謂得天下者非謂
其履勢稱尊號也言其運天下心得天下力
也有南面之名無一人之譽此失天下者也
故桀紂不爲王湯武不爲放也天下得道守

在四夷天下失道守在左右故曰無恃其不
吾奪恃吾不可奪也行可奪之道而非篡殺
之行無益於持天下矣

治世之職易守也其事易爲也其禮易行也
其責易償也是以人不兼官官不兼事農士
商工鄉別州異故農與農言藏士與士言行
工與工言巧商與商言數是以士無遺行工
無苦事農無廢功商無折貨各安其性也夫

先知遠見人材之盛也而治世不以責於民
博聞強志口辨辭給人智之溢也而明主不
以求於下傲世賤物不污於俗士之伉行也
而治世不以為民化故高不可及者不以為
人量行不可逮者不以為國俗故人材不可
專用而度量道術可世傳也故國治可與愚
守而軍旅可與性同不待古之英俊而人自
足者所有而並用之也末世之法高為量而

罪不及重為任而罰不勝危為難而誅不敢
民困於三責即飾智而詐上犯邪而行危雖
峻法嚴刑不能禁其姦獸窮即觸鳥窮即啄
人窮即詐此之謂也

國有亡主世無亡道人有窮而理無不通也
故不因道理之數而專己之能其窮不遠矣
夫君人者不出戶以知天下者因物以識物
因人以知人也故積力之所舉既無不勝也

衆智之所爲即無不成也工無二技士不兼
官人得所宜物得所安是以器械不惡而職
事不慢也夫責少易償也職寡易守也任輕
易勸也上操約少之分下效易爲之功是以
君臣久而不相厭也

地廣民衆不足以爲疆也甲堅兵利不足以
恃勝也高城深池不足以爲固也嚴刑利殺
不足以爲威也爲存政者無小必存爲亡政

者無大必亡故善守者無與御善戰者無與
鬪乘時勢因民欲而取天下也故善爲政者
積其德善用兵者蓄其怒德積而民可用也
怒蓄而威可立也故材之所加者淺即權之
所服者大德之所服者大德之所施者博即
威之所制者廣廣即我強而敵弱矣善用兵
者先弱敵而後戰費不半而功十倍故千乘
之國行文德者王萬乘之國好用兵者亡王

兵先勝而後戰敗兵先戰而後求勝此不明於兵道也

上行

非漠真無以明德非寧靜無以致遠非寬大無以并覆非平正無以制斷以天下之目視以天下之耳聽以天下之智慮以天下之力爭故號令能下究而臣情得上聞百官脩通羣臣輻湊喜不以賞賜怒不以罪誅法令察

而不苛耳目通而不暗善否之情曰陳於前而不逆賢者盡其智不肖者竭其力近者安其性遠者懷其德用人之道也夫乘輿馬者不勞而致千里乘舟楫者不能游而濟江海使言之而是雖在匹夫藹蕘猶不可弃也言之而非雖在人君卿相不可用也是非之處不可以貴賤尊卑論也其計可用不羞其位矣其言可行不貴其辨矣

文子問曰何行而民親其上老子曰使之以時而敬慎之如臨深淵如履薄冰天地之間善即吾畜也不善即吾讎也昔日夏商之臣反讎桀紂而臣湯武宿沙氏之民自攻其君而歸神農氏故曰人之所畏亦不可以不畏治大者道不可以小地廣者制不可以狹位高者事不可以煩民衆者教不可以苛事煩難治法苛難行求多難贍寸而度之至丈必

差銖而稱之至石必過石稱丈量徑而寡失大較易爲智曲辨難爲惠故無益於治有益於亂者聖人不爲也無益於用有益於費者智者不行也故功不厭約事不厭寡功約易成事省易治求寡易贍夫調音者小絃急大絃緩立事者賤者勞貴者逸道之言曰芒芒昧昧與天同氣同氣者帝同義者王同功者霸無一焉者亡故不言而信不施而仁不怒

而威是以天心動化者也施而仁言而信怒
而威是以精誠爲之者也施而不仁言而不
信怒而不威是以外貌爲之者也故有道以
理之法雖少足以治矣無道以臨之命雖衆
足以亂矣

鯨魚失水而制於螻蟻人君舍其所守而與
民爭事則制於有司以無爲持位守職者以
聽從取容臣下藏智而弗用反以事專其上

君人者不任能而好自爲則智日困而數窮
於下智不足以爲治威不足以行刑即無以
與下交矣喜怒形於心嗜欲見於外即守職
者離正而阿上有司枉法而從風矣賞不當
功誅不應罪即上下乖心羣臣相怨矣百官
煩亂而智不能解非譽萌生而明弗能照非
己之失而反自責即人主愈勞人臣愈逸矣
是代大匠斲者希不傷其手也與馬逐遠筋

絕不能及也。上車攝轡，馬死銜下，伯樂相之。王良御之，明主乘之，無御相之勞，而致千里。善乘人之資也。

國之所以存者，得道也。所以亡者，理塞也。故得生道者，雖小必大有；亡徵者，雖成必敗。國之亡也，大不足，特道之行也；小不可輕，故存。在得道不在於小，亡在失道不在於大。故亂國之主，務於廣地而不務於仁義，務於高位

而不務於道德，是舍其所以存而造其所以亡也。主與之以時，民報之以財；主遇之以禮，民報之以死生。而貴者驕，生而富者奢，故富貴不以明道自鑒，而能無爲非者寡矣。

上義

凡學者能明於天人之分，通於治亂之本，見其終始，可謂達矣。治之本，仁義也；其末，法度也。先本後末，謂之君子；先末後本，謂之小人。

法之生也以輔義重法弃義是貴其冠履而忘其頭足也仁義者廣崇也不益其厚而張其廣者毀不廣其基而增其高者覆故不大其棟不能任重重莫若國棟莫若德人主之有民猶城之有基木之有根根深即本固基厚即上安故事不本於道德者不可以爲經言不合於先王者不可以爲道治人之道其猶造父之御馬也內得於中心

外合乎馬志故能取道致遠氣力有餘進退還曲莫不如意誠得其術也今夫權勢者人主之車輿也大臣者人主之駟馬也身不以離車輿之安手不可以失駟馬之心故輿馬不調造父不能以取道君臣不和聖人不能以爲治執道以御之中材可盡明分以示之姦邪可止物至而觀其變事來而應其化近者不亂則遠者治矣不用適然之教而行自

然之道萬舉而無失矣

治國有常而利民爲本政教有道而令行爲
右苟利於民不必法古苟周於事不必循俗
故聖人法與時變禮與俗化衣服器械各便
其用法度制令各因其宜故變古未可非循
俗未足多誦先王之書不若聞其言聞其言
不若得其所以言得其所以言者言弗能言
也故道可道者非常道也名可名者非常名

也故聖人所由曰道所爲曰事道由金石壹
調不可更事猶琴瑟每終改調故法制禮樂
者治之具也非所以爲治也

法非從天下非從地出發於人間反己自正
也誠達其本不亂於末知其要不惑於疑有
諸己不非諸人無諸己不責於下所禁於民
者不行於身故人主之制法也先自以爲檢
戒故禁勝於身即行於民矣天法者天下之

準繩也人主之度量也懸法者法不法也法定之後中繩者賞缺乘者誅雖尊貴者不輕其賞卑賤者不重其刑犯法者雖賢必誅中度者雖不肖無罪是故公道行而私欲塞也古之置有司也所以禁民使不得恣也其立君也所以制有司使不得專行也法度道術所以禁君使無得橫斷也人莫得恣即道勝而理得矣故反於無爲無爲者非謂其不動

也言其莫從己出也

善賞者費少而勸多善罰者刑省而姦禁善與者用約而爲德善取者入多而無怨故聖人因民之所善以勸善因民之所憎以禁姦賞一人而天下趣之罰一人而天下畏之至賞不費至刑不盪聖人守約而治廣此之謂也

君臣異道即治同道即亂各得其宜處其當

即上下有以相使也故枝不得大於幹末不
得強於本言輕重大小有以相制也夫得威
勢者所持甚小所任甚大所守甚約所制甚
廣十圍之木持千鈞之屋得勢也五寸之關
能制開闔所居要也下必行之令從之者利
逆之者害天下莫不聽從者順也義者非能
盡利天下之民也利一人而天下從暴者非
能盡害海內也害一人而天下叛故舉措廢

量不可不審也

屈寸而伸尺小枉而大直聖人爲之今人君
之論臣也不計其大功德揔其細行而求其
不善即失賢之道也故人有厚德無問其小
節人有大譽無疵其小故夫人情莫不有所
短誠其大略是也雖有小過不足以爲累誠
其大略非也閭里之行未足多也
自古及今未有能全其行也故君子不責備

於一人夫夏后氏之璜不能無瑕明月之珠不能無穢然天下寶之者不以小惡妨大美也今志人之所短而忘人之所長而欲求賢於天下即難矣夫衆人見位卑賤事之洿辱而不知其大略也故論人之道貴即觀其所舉富即觀其所施窮則觀其所不受賤即觀其所不為視其所更難以知其勇動以喜樂以觀其守委以貨財以觀其仁振以恐懼以

觀其節如此即人情得矣

聖人以仁義爲準繩中繩者謂之君子弗中者謂之小人君子雖死亡其名不滅小人雖得勢其罪不除左手據天下之圖而右手刎其喉愚者不爲身貴乎天下也死君親之難者視死若歸義重於身故也天下大利比身即小身所重也比義即輕此以仁義爲準繩者也

地廣民衆主賢將良國富兵強約束信號令
明兩敵相當未接刃而敵人奔亡此其次也
知土地之宜習險隄之利明竒正之變察行
陣之事白刃合流矢接輿死技傷流血千里
暴骸盈野義之下也國之所以強者必死也
所以必死者義也義之所以行者威也威義
並行是謂必強白刃交接矢石若雨而士爭
先者賞信而罰明也上視下如子下事上如

父上視下如弟下視上如兄上視下如子必
王四海下視上如父必正天下上視下如弟
即不難爲之死下視上如是即不難爲之亡
故子父兄弟之寇不可與鬪是故義君內修
其政以積其德外塞其邪以明其勢察其勞
逸以知飢飽戰期有日視死若歸恩之加也
上禮

昔之聖王仰取象於天俯取度於地中取法

於人調陰陽之氣和四時之節察高下之宜
除飢寒之患行仁義之道以治人倫列地而
州之分職而治之立大學而教之此其治之
紀綱也得道即舉失道即廢夫物未嘗有張
而不弛盛而不敗者也唯聖人可盛而不衰
聖人初作樂也以歸神反法反其天心至其
衰也流而不反法而好色至以亡國其作書
也以領理百事愚者以不忘智者以記事及

其衰也為姦偽以解有罪而殺不辜其作圉
也以奉宗廟之具簡士卒戒不虞及其衰也
馳騁弋獵以奪民時其上賢也以平教化正
獄訟賢者在位能者在臧澤施於下萬民懷
德至其衰也朋黨比周各推其與廢公趨私
外內相舉姦人在位賢者隱處天地之道極
即反益即損故聖人治弊而改制事終而更
為矣聖人之道非修禮義廉耻不立民無康

耻不可治也不知禮義不可以行法法能教
不孝不能使人孝能刑盜者不能使人廉耻
聖王在上明好惡以示人經非譽以遵之親
賢而進之賤不肖而退之刑措而不用禮義
修而任賢德也夫使天下畏刑而不敢盜竊
豈若使無有盜心哉故知其無所用雖貪者
皆辭之不知其無所用廉者不能讓夫人之
所以亡社稷身死人手為天下笑者未嘗非

欲也知冬日之扇夏日之裘無用於己則萬
物之變為塵垢故以湯止沸沸乃益甚知其
本去大而已

夫有餘則讓不足則爭讓則禮義生爭則暴
亂起故物多則欲省求賸則爭止故世治則
小人守正而利不能動也世亂則君子為奸
而法不能禁也

豐水之深十仞而不受塵垢金鐵在中形見

於外非不深且清也魚鼈莫之歸石上不生
五穀禿山不游糜鹿無所蔭蔽也故爲政以
苛爲察以切爲明以刻下爲忠以計多爲功
如此者譬猶廣華者也大即大矣裂之道也

曾子

修身

曾子曰君子攻其惡求其過強其所不能去
私欲從事於義可謂學矣君子愛日以學及

時以行難者弗避易者弗從唯義所在日旦
就業夕而自省思以沒其身亦可謂守業矣
君子學必由其業問必以其序問而不決承
問觀色而復之君子既學之患其不博也既
博之患其不習也既習之患其不知也既知
之患其不能行也既能行之貴其不能以讓
也君子學致此五者而已矣君子博學而淺
守之微言而篤行之行欲先人言欲後人見

利思辱見難思詬嗜欲思耻忿怒思患君子
終身守此戰戰也君子已善亦樂人之善也
己能亦樂人之能也君子好人之爲善而弗
趨也惡人之爲不善弗疾也不先人以惡不
疑人以信不說人之過而成成人之美朝有過
夕改則與之夕有過朝改則與之君子終日
言不在尤之中小人一言終身爲罪矣君子
之於不善也身勿爲可能也色勿爲不可能

也心勿爲不可能也太上樂善其次安之其
下亦能自強也太上不生惡其次生而能夙
絕之其下復而能改復而不改墮身覆家大
者傾社稷是故君子出言悖行身戰戰亦殆
免於罪矣昔者天子日旦思其四海之內戰
戰唯恐不能夕也諸侯日旦思其四封之內
戰戰唯恐失損之也大夫日旦思其官戰戰
唯恐不能勝也庶人日旦思其事戰戰唯恐

刑罰之至也是故臨事而慄者鮮不濟矣
立孝

曾子曰君子立孝其忠之用也禮之貴也故
為人子而不能孝其父者不敢言人父不能
畜其子者為人弟而不能承其兄者不敢言
人兄不能順其弟者為人臣不能事其君者
不敢言人君不能使其臣者故與父言言畜
子與子言言孝父與兄言言順弟與弟言言

承兄與君言言使臣與臣言言事君君子之
孝也忠愛以敬反是亂也盡力而有禮敬而
安之微諫不倦聽從不怠權欣忠信咎故不
生可謂孝矣盡力而無禮則小人也致敬而
不忠則不仁也是故禮以將其力敬以入其
忠詩言夙興夜寐毋忝尔所生不耻其親君
子之孝也是故未有君而忠臣可知者孝子
之謂也未有長而順下可知者悌弟之謂也

未有治而能仕可知者先脩之謂也故孝子
善事君悌弟善事長君子壹孝壹悌可謂知
終矣

制言

曾子曰夫行也者行禮之謂也夫禮貴者敬
焉老者孝焉幼者慈焉小者友焉賤者惠焉
此禮也弟子毋曰不我知也鄙夫鄙婦相會
于墻陰可謂密矣明日則或揚其言者故士

執仁興義而不聞行之未篤也故蓬生麻中
不扶乃直白沙在泥與之皆黑是故人之相
與也譬如舟車然相濟達也已先則援之彼
先則推之是故人非人不濟馬非馬不走士
不士不高水非水不流弟子問於曾子曰夫
士何如則可爲達矣曾子曰不能則學疑則
問欲行則比賢雖有險道脩行達矣今之弟
子病下人不知事賢耻不知而又不問是以

感聞終其世而已矣是謂窮民
疾病

曾子曰君子之務蓋有矣夫華繁而實寡者
天也言多而行寡者人也鷹隼以山爲庫而
巢其上魚鼈鼃鼃以川爲淺窟穴其中卒其
所以得者餌也是故君子苟毋以利害義則
辱何由至哉親戚不悅不敢外交近者不親
不敢來遠小者不審不敢言大故人之生也

百歲之中有疾病焉故君子思其不可復者
而先施焉親戚旣沒雖欲孝誰爲孝乎年旣
耆艾雖欲悌誰爲悌乎故孝有不及悌有不
時其此之謂與言不遠身言之主也行不遠
身行之本也言有主行有本謂之有聞也君
子尊其所聞則高明矣行其所聞則廣大矣
高明廣大不在於他加之志而已矣與君子
游苾乎如入蘭芷之室久而不聞則與之化

矣與小人游膩乎如入魚次之室久而不聞
則與之化矣是故君子慎其所去就與君子
游如長日加益而不自知也與小人游如履
薄冰每履而下幾何而不陷乎哉

羣書治要卷第三十五



